



DEMOKRAATIT

UPA 2026/10

19/5-2026

Margrethe Thårup Andersen

Aningaasaqarnikkut Ingerlatsineq pillugu Nalunaarut 2026.

(Aningaasaqarnermut Naalakkersuisoq)

Naalakkersuisut Aningaasaqarnikkut Ingerlatsineq pillugu Nalunaarut 2026-mik saqqummiussinerinut qujanaq.

Aningaasaqarnikkut ingerlatsineq Demokraatinut kisitsisinut, naatsorsuutinut, iluarsiiisutinullu kisimi tunnganngisaannarpoq. Siullertut inunnut tunngassuteqarpoq. Ilaqutariit ulluinnarminnik ataqatigiissitsisinnaanersut pineqarpoq. Meerartagut pitsaasumik ilinniagaqalissanersut. Utoqqartagut toqqississimasumik, ataqqinassusilimmillu inuuneqarsinnaanersut. Napparsimasut pisariaqartikkaangamikku katsorsartissinnaanersut. Suliffeqarfigullu nuna tamakkerlugu suliffinnik, isertitanik, periarfissanillu pilersitsisinnaanersut.

Inuit piginnaasaat, akisussaaffeqarnerat, pilersitsisinnaassuseqarnerallu upperigatsigit politikki killilersuinngitsoq, inuussutissarsiutinullu eqqumaffiginnittoq Demokraatit anguniagaraat. Inuussutissarsiortut nukittunerusut, namminersorlutillu inuussutissarsiutillit amerlanerusut nukittunerusumik ataatsimoorinissamut tunngaviusut upperaarput. Atugarissaarnissamut illuatungiuunngilaq. Atugarissaarnissamut tassa tunngavik. Peqqinnissaq, ilinniartitaaneq, meeqqat, utoqqaat, inuiaqatigiinnilu toqqissisimanerunissaq aningaasaliiffigerusukkutsigit, taava aamma nunamut isertitaqarnerussaagut. Isertitat taakku immini takkunnavianngillat. Inunnit sulisunit, ilinniagaqartunit, akisussaaffimmik tiguisunit, suliffeqarfinnik aallartitsisunit, aningaasaliisunit, inuiaqatigiinnullu tapersiissunit pilersinneqartarput.

Nalunaarutip ersarissumik takutippaa, Kalaallit Nunaanni imaannaanngitsumik, aammali periarfissalimmi inissisimasugut. Nunat assigiinngitsut akornanni eqqissiviilliortoqarnerani aningaasaqarnerput ukiut qassiit ingerlanerini qajannaappoq, nalorninerli annertusisimavoq. Nunat tamalaat akornanni politikikkut pissanganartorsiornerit, niuernikkut akerleriinnerit, nukissiuutinut akit qaffasissut, assartuussineq akisunerusoq, aningaasalersuinermilu aningaasartuutit qaffasinnerusut naatsorsuutini kisimi eqquineq ajorput. Ilaqutariit ulluinnarni inuuniarnerat, suliffeqarfiit aningaasartuutaat, sanaartornermi akit, aningaasaliisariaqarnerillu ingerlanneqarnissaannut periarfissagut eqqorneqartarput.

Tamanna pillugu Demokraatit oqariartuutaat ersarilluinnarpoq. Aningaasaqarnermut politikkimik



DEMOKRAATIT

akisussaassusilimmik ingerlatsisariaqarpugut, ingerlatsissalutalu. Sakkortunerusumik pingaarnersiuissaagut. Siunissamut qaninnerusumut aaqqiissutit ullumikkut aaqqiissutissaqqissutut isikkullit, kinguaatsinnulli akiligassanngortussat pinaveersaassavagut. Aaqqissuusseqqinnerillu inuiaqatigiinnitsinnut imminut napatitsinerulersitsisussat, qajannaannerulersitsisussat, kiffaanngissuteqarnerulersitsisussallu ingerlannissaannut sapiissuseqassalluta.

Aningaasatigut killilimmik siuariartormik, aningaasaqarnermillu suli tatineqartumik nalunaarut takutitsivoq. Unneqqarissalluni pingaaruteqarpoq. Siunissami atugarissaarnissaq neriuuteqarnerinnarmik pilersissinnaanngilarput. Assinganillu isertitaraqani pisortat suli aningaasartuuteqarnerunerinik pilersissinnaanatigu. Pisortat ingerlatsinerat isertitassanut tunngavissatsinnit sukkanerusumik annertusiartorpat, taava politikikkut akisussaassuseqartariaqarpoq.

Tassunga atatillugu inuiaqatigiit katitigaanerat unammillernartitatta annersaasut ilagaat. Nalunaarutip takutippaa ukiuni aggersuni utoqqaat annertuumik amerlissasut, illuatungaanilu innuttaasut sulisinnaasut ikilissasut naatsorsuutigineqarluni. Imaappoq, ataatsimoorussamik suliassat annersaat inuit ikitsuinnaat nammassagaat. Teknikkikkut unammillernartuinnaanngilaq. Inuttut unammillernarpoq. Inuusunnerusut naleqqutinngitsumik annertuumik ilungersortinnagit, utoqqarnut ataqqinninnissaq qanoq qulakkiissaneripput pineqarpoq. Ikiorneqarnissaq pisariaqartinneqartillugu ikiorneqarsinnaalluni, ilutigisaanillu nammineq inuunerup ilusilersorneqarnissaanut kiffaanngissuseqarluni inuiaqatigiit qanoq piginnarsinnaanerigut pineqarpoq.

Tamanna pillugu inuit amerlanerusut sulilersinneqarnissaat, ilinnialersinneqarnissaallu aalajangiisuvoq. Suliffeqarneq sumiiffippassuarni suliffissaaleqisunik ikitsuinnarnik, kisianni aamma nunap immikkoortortani annertuumik assigiinngissutsinik, sulisunillu piginnaasalinnik amigaateqarnermik suli sunnertisimavoq. Pingaartumik ilinniarsimasunik amigaateqarneq ineriartortitsinissamut imaannaanngitsumik akimmiffiuvoq. Inissiat, nukissiuutit, attaveqaatit, takornarialerineq, aatsitassallu pillugit pilersaaruterpassuaqarsinnaavugut, pisariqartitanilli piginnaasanik piginnaasallit piginnikkutsigit pilersaarutit piviusunngunngisaannassapput.

Tamanna pillugu ilinniartitaanermut aningaasaliineq, aningaasaliinitsinni pingaaruteqarnerpaat ilagaat. Imaanngitsoq ilinniartitaaneq periusissiami isikkorimmat, kisianni ilinniagaqarnerup inuk kiffaanngissuteqartittarmagu. Imminut pilersornissamut kiffaanngissuseqarneq. Inuunermi aqqummik qinersinissamut kiffaanngissuseqarneq. Piginnaasanik tapersiissuteqarnissamut



DEMOKRAATIT

kiffaanngissuseqarneq. Inuusuttut amerlavallaat toqqaannartumik ilinnialernej ajortut, inersimasunngorlaallu amerlasuut inuusuttut ilinniartitaanerini ilinniakkamik naammassinnissimangitsut nalunaarut tikkuussippat, tamanna pimoorulluinnarlugu tigussavarput.

Demokraatit isumaqarput meeqqat atuarfiat, ilitsersuineq, inuusuttut ilinniartitaanerinit ikaarsarneq, inuussutissarsiutinut ilinniartitaanerit, praktikkerfissat, ilinniartunullu ineqarnermut tunngasut ataqatigiittutut isigineqassasut. Systemit akornanni inuusuttut annaassanngilagut. Siusinnerusukkut, ersarinnerusumik, inuppalaarnerusumillu naapissavagut. Inuusuttut amerlanerusut inuiaqatigiinni inissaqarlutik, piginnaasaallu pisariaqartut misigisimassapput. Uani atuagarsornermik, aammali inuussutissarsiutitigut sulianik ingerlatsisut eqqarsaatigalugit.

Ilutigisaanik ilinniarnej inuussutissarsiutinik ingerlataqartut pisariaqartitaannut ataqatigiinnerusaaq. Inuussutissarsiornej pillugu klassit, ilitsersuineq, suliffeqarfinnullu pitsaannerusumik attaveqarneq sulissutigineqarmata pitsaavoq. Tamanna tapersorsorlugulu nukittorsassavarput. Inuusuttummi suliffivinnik, suliaqarfinnik aalajangersimasunik, periarfissavinnillu ilisimasaqalerunik ilinniarnej eqqarsaataannarmik pisussaaffiussanngilaq. Nammineq inuuneqalernissamut aqqutissanngusaaq.

Nalunaarutip aamma takutippaa, avammut niuernermit inuussutissarsiutini aalisarneq suli pingaarnersaasoq. Tamanna akuersaassavarput. Aalisarneq illoqarfippassuarni, nunaqarfippassuarnilu suliffinnik, isertitanik, inuunermilu tunngavimmik pilersitsisarpoq. Kisianni aamma nalunaarutip takutippaa, pingaarnertut suliassaqarfik ataasiinnaq taamak apeqqutaatigissappat aningaasaqarnerput killegartoq. Tamanna pillugu aalisarneq paarilluassavarput, isertitaqarfissanillu allanik ineriartortitsilluta.

Piujuartussamik aalisarneq Demokraatinut aningaasaqarnikkut, ileqqorissaarnissamillu akisussaaffiuvoq. Pisuussutit uagutsinnit ullumikkut inuusunit kisimi pigineqaannanngillat. Kinguaassatta aamma pigaat. Tamanna pillugu aalisarneq siunissami aamma isertitaqarfiulluarsinnaanngorlugulu pisassiissutit, ingerlatsinerlu aaqqissuunneqassapput. Taamaattoqassappat pisuussutinik piujuartitsinissaq ataqqineqartariaqarpoq, aammali inuit aalisarnermik inuussutissarsiuteqartut ataqqineqartariaqarlutik.

Kisianni aalisarneq kisiat isumalluutigissanngilarput. Aningaasaqarnikkut siammassinnerusumik tunngavissamik pilersitsinissamut takornarialerineq, aatsitassat, nukissiuutit, imeq, sermeq, inuussutissarsiorfiillu allat periarfissatut nalunaarutip tikkuarpai. Siunnerfik tamanna Demokraatit



DEMOKRAATIT

tapersersorpaat. Aningaasaliinissanut nunarput pilerinarnerulersissavarput. Malittarisassaatiqut ersarissapput, paasiuminassapput, sulianik suliaqartarnej sukkanerussaaq, sinaakkutillu allanngujaassallutik. Aningaasaliiniarnermi toqqissisimannginneq ujartorneqarneq ajorpoq. Suliffeqarfiit suut piumasaqaataasut ilisimanngikkunikkit aningaasaliissanngillat. Tamanna pillugu siumut ilisimasaqarnissaq inuussutissarsiutit pillugit politikikkuinnaq kissaataangilaq. Suliffeqarfinnut, isertitanullu tunngaviuvoq.

Takornarialerineq periarfissarpassuaqarpoq, isumatusaartumilli ineriartortinneqassaaq. Tikeraat amerlineqarnissaat immiini naammanngilaq. Takornarialerineq najukkami naleqalersitsinissaa, najukkami inuiaqatigiit malinnaasinnaanissaat, attaveqaatillu artukkerneqannginnissaat qulakkiissavarput. Akitsuutit, aaqqiissutillu isumatusaartumik ilusilersorneqassapput. Naapertuilluassapput, ersarissapput, naleqqussarluarsimassallutillu. Inuussutissarsiutinik ipititsissanngillat, naleqalersitsinerulli naleqquttumik annertussusaa tamanut iluaqutissanngornissaa, attaveqaatinullu aamma piginnaasanut takornarissat namminneerlutik pingitsoorsinnaanngissaannut atorneqarsinnaanissaa qulakkiissallugu.

Aatsitassanut suliassaqarfik aamma periarfissaqarpoq. Maani nunap ataa, nunarsuarmioqatitta piumasaannik pisuussuteqarpoq. Tutsuiginartunilli sinaakkuteqarutta, piginnaasalimmik ingerlatsigutta, avatangiisit ataqqigutsigit, ineriartortitseqataasinnaasunillu sulisoqarutta aatsaat periarfissat piviusunngorsinnaapput. Tassunga atatillugu avataanit aningaasaliinernut isiginnaartuuginnannginnissarput pingaaruteqarpoq. Peqataassaagut. Taamaattoqassappat ilinniarsimasaqariaqarpoq, suliatiqut piginnaasaqartariaqarpoq, aningaasaliisoqarsinnaajunnaarlugulu sinaakkutit sakkortutippallaarnagit najukkami naleqalersitsinissamik piumasaqartariaqarluni.

Peqqissutsimut tunngasoq pissusissamisoortumik nalunaarummi sammineqangaatsiarpoq. Sulilersitsiniarnerit, taartinut aningaasartuutit, nakorsaatit, napparsimasunik angallassineq, nunap avataani katsorsaaneq, innuttaasullu inooqqortusiartuinnartut pillugit peqqinnissaqarfik ilungersunartumik inissisimavoq. Demokraatit isumaqarput, suliaqarfinni ersarilluinnartumik inuup salliunneqarfissaani peqqissuseq ilaasoq. Inuk napparsimaleruni systemi toqqissisimanassaaq, naleqqutissaaq, atorneqarsinnaassalluni. Tamannarpiaq pillugu aningaasaqarneq aamma unneqqarissumik aamma eqqartussavarput. Aningaasat amerlanerusut ajornartorsiutinik tamanik aaqqiinaviannngillat. Aqutsilluarnernissaaq, pilersaaruseriorluarnernissaaq, kisitsisit atorlugit paasissutissat pitsaannerusut, sakkortunerusumik aqutsinissaaq, aaqqissuussinerlu ataqatigiinnerusooq pisariaqarput. Peqqinnissaqarfik pillugu isumaqatigiilernerup annertusillugu suliarineqarnera, peqqinnissaqarfiullu siunissamut ungasinnerusumut pilersaaruseriorfigineqarnera



tapersorsorparput. Taamaakkaluartoq erseqqissaatigerusupparput, napparsimasoq qitiussammat. Systemiunngitsoq. Suliffeqarfiunngitsut. Ileqqutoqqaanngitsut. Napparsimasup isumannaassusaa, katsorsaaneq, naleqassuserlu aaqqissusseqqinnerni aqutsisuussapput.

Utoqqarnut tunngatillugu suliassaqarfik taamatulli ippoq. Utoqqaat amerliartorpata, utoqqaat nanertuutitut eqqartussanngilagut. Utoqqaat inuiaqatigiinnitsinnik ineriartortitsisuupput. Sulinikuupput, meeqqanik perorsaaniikuupput, ilaqutariit pilersornikuuat, ataatsimoornermullu tapersiisuteqarnikuullutik. Ataqqineqartariaqarput. Ataqqinnissagaannili aamma piffissaagallartillugu pilersaarusiortariaqarpugut. Aaqqissusseqqinnissat kinguartikkutsigit sullissineq ajornerulissaaq, sulisut sulerulunnerulissapput, utoqqaallu ataasiakkaat ataqqinartinneqarnerat annikinnerulissalluni. Tamanna pillugu utoqqarnut suliassaqarfik pineqartillugu inissiat, peqqissuseq, kommunini aningaasaqarneq, angerlarsimaffimmi ikiortit, pinaveersaartitsineq, inuiaqatigiillu akisussaaffii ilanngullugit eqqarsaatigineqassapput.

Nalunaarutip aamma takutippaa, pisortat aningaasartuutaat ilungersunartumik inissisimasut. Aningaasartuutit amerlanersaat akissiarsianut tuttarput, atugarissaarnermullu suliassaqarfinnut qitiusunut aningaasartuutit ilungersunartumik inissisimasut qaffakkaluttuinnarlutik. Demokraatit isumaqarput, pisortat aningaasaataat ataqqinnittumik atorineqassasut. Aningaasanik atukkatsinnik innuttaasut, suliffeqarfiillu pilersitseqataapput. Tamanna pillugu pitsaassuseq, sunniutissaq, akisussaassuseqartumillu aqutsineq pillugit piumasaqassaagut. Soqutigittaannerunngilaq. Isumassuineruvoq. Aqutsinngikkutta aningaasat atugarissaarnissamut atugassagut ikinnerussapput, inuillu ikiorneqarnissaminnik pisariaqartitsinerpaat eqqorneqassallutik.

Tamanna pillugu aningaasaqarnermik aqutsilluarnissap, immikkoortunut pilersaarutit, inuiaqatigiit aningaasaqarnerinik naliliinerit, digitaliseerinngorsaaneq, pisariillisaanerlu sularineqarnerat pitsaasutut isigaarput. Taamaakkaluartoq aaqqissusseqqinnerup pappiararsorninngornissaa mianersoqqutiginiarparput. Ilitsersuineq pitsaanerusumik aalajangiinernik kinguneqanngippat, ilitsersuineq nutaaq innuttaasut malugissanngilaat. Periusissiaq sukkanerusumik qulaajaanernik, sinaakkutinillu allanngujaannerusunik kinguneqanngippat, suliffeqarfiit malugissanngilaat. Misissueqqissaarneq pitsaanerusumik katsorsaanermik kinguneqanngippat, misissueqqissaarneq napparsimasut malugissanngilaat. Aalajangikkagut pissutsinik pitsanngorsaasutut malugineqarsinnaassapput.

Kommunit aningaasaqarnerat, suliassaallu aamma qitiupput. Atugarissaarnissamut suliassat pingaarnerit amerlasuut innuttaasunut qanipput. Meeqqat, ilaqutariit ikiortariallit, utoqqaat, suliffissaqartitsiniarneq, isumaginninermilu suliniutit pineqarput. Tamanna pillugu



DEMOKRAATIT

Namminersorlutik Oqartussat aamma kommunit sunniivigeqatigiinnerat pitsaanerussaaq. Suliassat agguataarneqarnerat, aaqqissuussineq, aningaasallu atukkagut naammattumik pissariaqaatiginerlugit qiviarsinnaasariaqarpagut. Kisianni kommunit atugaat aamma illoqarfiit, nunaqarfiillu akornanni assigiingissuserujussuit ataqqillugit tamanna pissaaq.

Ineqarnermut tunngasoq aamma qiviarneqartariaqarpoq. Inissianik amigaateqarnerup nuttarnersinnaaneq, ilinniarsinnaaneq, sulilersitsisinnaaneq, inuussutissarsiutinillu ineriartortitsisinnaaneq akimmiffilersorpaa. Ilinniartitsisoq, peqqissaasoq, assaminik sulisartooq imaluunniit ilinniartooq inuusuttoq inissarsisinnaangippat, politikkikkut anguniakkat allat angujuminaannerulissapput. Ilutigisaanik ineqarnermi aningaasaqarneq atasinnaassaaq. Ineqarnermut akiliutit, aserfallatsaaliineq, aningaasaliinerit, pingaarnersiunerillu pillugit ilmuussuseqartariaqarpoq. Inissiat pappiaqqatigut akikipkata, illuutit aserfallappata akiligassarlu kinguartiinnarneqarpat iluaqutaanaviangilaq.

Danmarkimi naalackersuisunut sinaakkutissatut isumaqatigiissut, avataaniillu aningaasat nalunaarummi eqqaaneqartut periarfissaqartitsippat. Pingaartumik peqqinnissamut, nukimmik pilersuinerup isumannaatsuuneranut, attaveqaatinut, aningaasaliinernullu allanut. Aningaasat maani ineriartornermut annertusaasinnaasut Demokraatit tikilluaqqaat. Isumatusaartumillu atussavagut. Ilassutitut aningaasaliissutit utoqqatsissutigineqassanngillat. Ataavartumik piginnaasanik pilersitsinissamut, sullissinerup pitsaanerulersinneqarnissaanut, aningaasaqarnikkullu pitsaasumik angusaqarnissap nukittorsarneqarnissaanut atorineqassapput. Aningaasat ataavartussaangitsut, siunissamut pilersaaruteqarani ataavartumik aningaasartuutitut aningaasalersuutigineqassanngillat.

Tamanna pillugu nuna tamakkerlugu aningaasaliinissamut periusissiaq pingaaruteqarpoq. Inuiaqatigiinnut naleqarnerpaasussaaq malillugu aningaasaliinerit pingaarnersiussavagut. Kina nipitunerunersoq imaluunniit tusagassioffinnut nalunaaruteqarnermi suliniutit suut pitsaanerorpasinnersut pinnagu. Aningaasaqarnitsinnut, attaveqaatitsinnut, nukissiutinik pilersuinitinnut, inuussutissarsiortunut, inunnullu isumalluutitsinnut nukittorsaasussat aningaasaliiffigissavagut. Unneqqarissaagullu suna tamarmi ataatsikkoorsinnaanngimmat.

Nuna imminut napatinnerusoq Demokraatit kissaatigaat. Imminullu napatinneq takussutissiatut oqaasiinnaanermit annerusariaqarpoq. Amerlanerusut sulisariaqarput. Ilinniarneq pitsaanerusariaqarpoq. Inuussutissarsiortut nukittunerusariaqarput. Aningaasanik pitsaanerusumik atuisunik pisortaqaqartariaqarpoq. Siunissami aningaasassat ullutsinni ilorrisimaarniutitut atorineqaratik, pitsaasumik aningaasaqartariaqarpugut. Pingaarnersaanullu



anngaasinnaaniassagatta, nameernissaq pisariaqartillugu politikkikkut naameersinnaasariaqarpoq.

Inuk salliutissavarput. Kisianni inuk salliukkutsigu imaangilaq suna tamaat anngaassagipput. Imaappoq, inunnut ilumut ikiuutaasussat salliunniarigut. Imaappoq, uninngaannarnermit ilinniagaqarneq toqqaripput. Pinngitsoortitsiniarluni iliuutsinit, pinaveersaartitsineq toqqaripput. Maleruunnermit, inuussutissarsiutinik ineriartortitsineq toqqaripput. Siunissamut qaninnerusumut nuannarineqarnermit, akisussaassuseqarneq toqqaripput. Pisariaqanngitsumik ingerlatsineq allaffimmi pissutsinik tunngaveqarpallaarneranit, kiffaangissuseqarneq toqqaripput.

Aningaasaqarnikkut Ingerlatsineq pillugu Nalunaarut 2026-mi Demokraatit tusaatissatut tiguaat. Nalunaarutip ersarilluinnartumik takutippaa periarfissaqartugut, kisiannili aamma periarfissat iliuuseqarfigineqartariaqartut. Ineriartorneq aquinnarsinnaangilarput. Ilusilersussavarput.

Nunatsinni amerlanerusut imminnut pilersorsinnaanissaat, suliffeqarfiit ineriartorsinnaanissaat, inuusuttut ilinnialernissaminnut aamma suliffeqalernissamut periarfissaqarnissaat, napparsimasut toqqissisimanartumik nakorsiarsinnaanissaat, utoqqaat ataqqineqarlutik sullinneqarnissaat, ataatsimullu aningaasaatit eqqarsarluarluni atorineqarnissaat anguniagaraarput.

Tassa taanna akisussaassuseqartumik aqutissaq. Tassa taanna kiffaangissuseqarnissamut aqutissaq. Demokraatillu isumaqarput taanna aqutissaasoq inuppalaartoq.